

Headlines

1. उपराज्यपाल मनोज सिन्हा हो'रें अज्ज 2019 बरे च पुलवामा आतंकी हमले च शहीद होए दे सी.आर.पी.एफ जोआनें गी श्रद्धांजलि अर्पित कीती।
2. मुखमंत्री उमर अब्दुल्ला हो'रें श्रीनगर च 11में SKUAST कश्मीर Agri Tech मेले Gongul 2026 दा उदघाटन कीता।
3. आतंक रोधी अभियानें गी तेज करदे होई पुलस नै डोडा जिले च कोई सार्वजनिक थाहरें पर सक्रिय आतंकवादियें दी जानकारी हासल करने लेई उन्दे पोस्टर लाए न।
4. जम्मू च अंतराष्ट्रीय बन्नै दे इस पार- पाकिस्तान थमां ड्रोन राहें सुट्टी गेदी साड्डे 6 किलो कोला मती हिरोइन जब्त कीती गई।
5. ते क्रिकेट च रणजी ट्रॉफी दे कलै थमां शुरु होआ'रदे सैमीफाईनल च जम्मू-कश्मीर दा लक्ष्य बंगाल खलाफ शानदार प्रदर्शन करना ऐ।

<><><><><><>

LG -Pulwama Tribute

उपराज्यपाल मनोज सिन्हा हो'रें दक्खनी कश्मीर दे पुलवामा जिले च 14 फरवरी 2019 गी होए दे आतंकवादी हमले च शहीद होए दे केन्द्री रिजर्व पुलस बस सी.आर.पी.एफ दे जोआनें गी अज्ज श्रद्धांजलि अर्पित कीती। इक सोशल मीडिया पोस्ट च एल.जी हो'रें इस आतंकवादी हमले च अपनी ड्यूटी गी अंजाम दिंदे होई- शहीद होए दे सैनिकें गी सम्मानित करदे होई आखेया जे उंदी अनत्रुट निष्ठा- बेमिसाल बहादुरी ते राष्ट्र लेई निस्वार्थ सेवा हर इक नागरिक गी म्हेशां प्रेरित करदी रौहगा। इस दर्दनाक आतंकी हमले च सी.आर.पी.एफ दे 40 जोआन शहीद होए हे।

<><><><><><>

Pulwama Tribute

तोंआई इस्सै सिलसिले च उधमपुर च सी.आर.पी.एफ दी इक सौ सैंती बटालियन च अज्ज इक श्रद्धांजलि समारोह आयोजित कीता गया- जेहदे च 137 सी.आर.पी.एफ बटालियन दे कमांडेंट-जोआनें ते समुदाय दे सदस्यें सनें युनिट दे सीनियर अफसरें- देसै लेई अपनी जिंदू दा बलिदान करने आलें शहीदें गी श्रद्धांजलि दिती।

<><><><><><>

CM –Gongul

मुख्यमंत्री उमर अब्दुल्ला हो'रें अज्ज श्रीनगर दे शालीमार च 11में SKUAST कश्मीर Agri – Tech मेले Gongul -2026 दा उदघाटन कीता- जेहदे कन्नै जम्मू-कश्मीर च राई-बाई ते ग्रामीण आजीविका गी मजबूत करने लेई नवाचार- प्रोद्योगिकी ते करसान केन्द्रित पैहलकदमियें गी उजागर करने आले इक जीवंत मंच दी शुरुआत होई ऐ। इस मेले दा विषेसार ऐ- अगली पीढी दी राई-बाई- “मेरा उत्पाद- मेरा मुल्ल” जेहदे च कृषि प्रोद्योगिकी- प्रदर्शनियां- स्टार्ट-अप- खरीददारें ते विक्रेताएं दी बैठकां- FPO सम्मेलन- Food Carnival ते करसानें ते साईसदानें दे गल्लबात आले सत्र वगैरा शामिल होगंन।

<><><><><><>

Terrorists Posters

आतंकवाद रोधी अभियानें गी तेज करने दे मद्देनजर जिले च पुलस नै सक्रिय आतंकवादियें दे बारे च जानकारी हासल करने लेई केई महत्वपूर्ण थाहरें पर पोस्टर लाए न- जिंदें च प्रतिबंधित आतंकी गुट जैश-ए-मोहम्मद दा इक पाकिस्तानी कमांडर बी शामिल ऐ- जेहदी पंछान सैफुल्ला दे तौरा पर कीती गई ऐ। जम्मू खिते दी उच्चियें धारें पर हाल च होए दे टाकरे ते इलाके च आतंकवादियें दी मौजूदगी बारे खुफिया जानकारी थ्होने मगरा एह गैंड पुट्टी गई ऐ। एह पोस्ट मुख-मुख नाके ते सार्वजनिक थाहरें पर लाए गे- जिंदे च नगरी-देसा- गणपत पुल ते ठाठरी शामन न।

<><><><><><>

Shiv Khori Mela

रियासी जिले च मन्त्री-परमन्त्री दी धार्मिक थाहर शिवखोडी च त्रौं दिनें दा सलाना “शिवखोडी मेला” अज्ज पूरे उत्साह कन्नै शुरु होआ। रियासी दे विधायक कुलदीप राज दुबे होरें जिला प्रशासन दे ऐहलकारें- श्राईन बोर्ड दे मिम्बरें ते बड़ी मती गिनतरी च किट्टे होए ते श्रद्धालुएं दी मौजूदगी च इस मेले दा आधिकारिक तौरा पर उदघाटन कीता। लोकें गी सम्बोधित करदे होई विधायक होरें जिला प्रशासन दे जतनें दी सराहना कीती।

त्रंई दिनें तगर चलने आहले इस धार्मिक मेले च जम्मू-कश्मीर दे बक्ख-बक्ख हिस्सें ते प्रदेशें दे बाहरले राज्यें थमां ज्हारां बद्दे श्रद्धालें दे औने दी मेद कीती जा’रदी ऐ।



Drugs Recovered

बी.एस.पी. दी 165मी बटालियन ते जम्मू-कश्मीर पुलस नै सांझै अभियान च जम्मू जिले दे आर.एस.पुरा सैक्टर दे बासपुर इलाके च स्थित नैई बस्ती करोताना थमां तकरीबन साड्डे 6 किलो हिरोइन बरामद कीती। ड्रोन राहें सुट्टे गेदे इस नशीले पदार्थ दी अंतराष्ट्रीय बजार च कीमत तकरीबन 40 करोड़ रपे ऐ। अंतराष्ट्रीय बन्ने दे आग्गे-लाग्गै संदिग्ध ड्रोन सरबन्धी गतिविधियें दी सूह थ्होने पर अद्दी रातीं एह अभियान चलाया गया। बडड्लै इस अभियान दे चलदे कनकें दे खेत्तरें चा हिरोइन कन्नै भरोचे दे 2 पैकेट बरामद कीते गे।



Ranji Semifinal

पैहली बारी सैमीफाईनल च पुज्जने आहली जम्मू-कश्मीर दी टीम कल्लै थमां शुरु होआ’रदी रणजी टॉफी दे सैमीफाईनल च दिग्गज टीम बंगाल कन्नै मकाबला करोग। इंदौर च मध्य-प्रदेश गी हराइयै 56 रन्जें दी जित्त कन्नै इतिहास रचदे होई जम्मू-कश्मीर दी टीम नै पैहली बारी सैमीफाईनल च अपनी थाहर बनाई ऐ। 1960 च टूर्नामैन्ट दे मगरा इस टूर्नामैन्ट च इंदा सब्भनें थमां शैल प्रदर्शन रेहा। सैमीफाईनल दा मकाबला कल्याणी दे बंगाल क्रिकेट अकैडमी ग्राउंड च खेडेया जाहग- जेहदे कन्नै बंगाल टीम गी घरेलू ग्राउंड दा फायदा होग। कागजें पर जित्थे बंगाल गी जबरदस्त दावेदार मन्नेया जा’रदा ऐ उत्थे गै जम्मू-कश्मीर टीम नै बाकी टीमें गी चुनौती देने आस्तै आत्मविश्वास ते अनुशासन च रेहियै शानदार प्रदर्शन दिता।

Abhilove Reception

बन्ने कन्नै लग्गदे इलाके पुंछ च गर्व ते जश्र दी लैहर ही- जिसलै सिविल सोसाइटी दे मैम्बरें- युवा समूहें- खेड्डु प्रेमियें ते मकामी लोकें बड़ी बद्ध गिनतरी च किट्टे होइयै भारत दी गौरवशाली पुत्री ते भारतीय महिला राष्ट्रीय लैकरन्ज दी खडारी अभिलव कौर दा बड़ी गर्मजोशी कन्नै सोआगत कीता। अभिलव कौर रियाद च आयोजित 2026 Assian Lacroose खेड्डें च ऐतिहासिक सुन्ने दा तगमा जित्तने दे मगरा पैहली बारी अपने ग्रांस पुज्जी ही। उं'दी इस उपलब्धि ने नां सिर्फ पुंछ बल्के पूरे देशै गी गर्व मसूस करोआया ऐ।



DIC Ramban Workshop

जिला उद्योग केन्द्र (DIC) रामबन नै सरकारी पॉलिटैक्रिक कालेज रामबन च इक जागरुकता कार्यशाला दा आयोजन कीता। कार्यशाला दा मकसद उद्योग ते बन्ज बपार मैहकमें आसेया DIC रामबन दे राहें चलाई जा'करदी स्कीम RAMP- PMEGP स्कीम- पी.एम विश्वकर्मा ते होर'नें मुख्क योजनाएं दे तैहत उद्योग पंजीकरण दे बारे च जागरुकता बधाना हा। इ'नें स्कीमें दा मकसद नौजवानें गी नौकरी लैने आहले दे बजाय रोजगार पैदा करने आहलें दे तौर पर बढावा देना ऐ। पढे-लिखे दे बेरोजगार नौजवानें गी होरनें पैहलकदमियें दे कन्नै-कन्नै निर्माण ते सेवा खेत्र दे उद्यमें गी स्थापत करने लेई PMEGP दे तैहत उपलब्ध माली मदाद- सब्सिडी ते प्रोत्साहनें दे कन्नै-कन्नै होरनें स्कीमें दी जानकारी दिती गई।

